

四庫全書

集部

欽定四庫全書

武溪集卷十九

宋 余靖 撰

墓誌上

宋故狄令公墓銘

并序

惟宋四世嘉祐二年三月陳州上言護國軍節度使同
中書門下平章事狄公属疾於鎮詔遣國醫馳視未至
以薨聞天子震悼為之素服發哀再不視朝制贈中書
令厚賻其家褒勲臣也公諱青字漢臣贈太傅諱應之

曾孫贈太師諱真之孫贈中書令諱普之少子汾州西
河人遠祖唐納言梁文惠公仁傑本家太原危言直節
再復唐嗣子孫或從汾晉世為著姓公謹重信厚風骨
異常少以騎射為樂期於功名自立弱冠遊京師係名
拱聖籍中國家自北人請盟韜偃師節息烽徹警垂四
十年元昊世以河西稱藩常歲遣牙校貢方物胡賈往
來直抵都下奸人窺覘知我虛實一旦上還印節僭盜
名字朝廷始增兵擇將以為戎備時寶元元年也公初

以散直為延州指使賊昊宿心苞藏椎鋒甚銳吾邊弭
兵滋久士不知戰他將過之靡不折衄延安最當賊衝
公以材武智略頻與賊較未嘗少沮四年之間大小二
十五戰中流矢者八斬捕首虜萬餘獲馬牛羊橐駝驢
鎧甲符印器仗以數萬計攻賊金湯城及西南馬市至
於杏林原破其鎮砦七遂略宥州之境屠龍咩歲香等
部落燔其積聚數萬廬舍千餘收其族帳二千三百生口
五千七百又城橋子谷築招安豐林新塞大郎堡皆扼

賊之要害而奪其氣朝恩懋賞七遷至秦州刺史涇原
路兵馬副部署上奇公功欲召見之無何寇逼平涼廼
命公即趨涇原俾圖形以進京師不呼公名而呼狄萬
蓋比之關張也公在涇原數歲賊不敢犯塞復以夏國
主稱臣由是邊圻解嚴矣遂以待衛親軍職名寵公徙
真定府路部署累遷至彰化軍節度使知延州羌人脩
貢道出高奴邊事裁處不遑中覆故會議帥臣常為諸
鎮之首公當是任邊戎畏伏乃召為樞密副使會蠻寇

內侵嶺海警擾公以疆場之虞廊廟之憂抗章請行寬
上南顧上嘉其誠遂改宣徽南院使荆湖南北路宣撫
使提舉廣南經制賊盜事初儂氏之蠻世為首豪羈附
交趾智高趨勇而善用兵因擊并旁近州邑而統有之
拓地寢廣勝兵寢盛交趾不能制南方亡命者多歸之
由是僣正朔置百官潛窺據竊嶠南之計以皇祐四年
五月舉兵攻邕州陷之乘鬱江瀑流連陷浚江九郡殺
逐其守臣遂攻廣州圍之連月不尅大掠而還仍覆沒

四將燔毀二郡俘劫兵民數萬復據邕州城誘略溪峒
江湘已南為之騷然朝旨以公大臣既可其行第令駐
於桂象之間訓練師旅而指授方略於羣帥公以二廣
安危在此一舉若偏裨失利則兵氣難振自非躬親無
以號令先行後聞朝議避之五年正月甲辰三將之兵
會於賓州公接士大夫以禮御下以嚴臨敵制變衆莫
之測已酉下令人賦十日之糧諜者既去詰旦遂行故
賊以師期尚緩不克守險者以此已未至歸仁鋪賊悉

其衆據高迎戰前鋒遇之少却左第一將孫節死之公親執旗鼓麾騎兵左右馳出賊後賊遂大敗馳騎追捕斬首二千二百賊之謀主黃師處懷建忠等腹心爪牙沒於陣者五十七人智高焚營而遁明日按兵入城獲金銀器用二萬戎仗稱是偽符節十一馬牛千餘老壯士女還城者三千餘人再遣閭閻外創重歸死者復得屍三千二百朔日分兵追襲賊之餘黨幾殲焉招復虜口七千三百其邕人也俾奠其居非邕人者賑廩續食

還其本土所得賊之遺物暨首級之賞估直四十萬均
給戰士仍築京觀以誌武功二月丙子班師辛巳詔遷
檢校太尉河中尹召還樞府遂曲赦廣南至於江西湖
南咸宣布德音焉未幾進拜樞密使領節如故仍賜城
南第一區諸子悉增其秩職居機軸勢均台宰外頒戎
馬之政內參宮省之務弼違順義動協厥中越四年願
去權寵以辭盛滿遂兼相印出臨輔郡暴疾而終享年
五十公天賦明智世推權勇臨事董衆識與幾會其行

師也所統步騎不以衆寡常取諸葛武侯八陣法以為
模楷宿息坐作悉成部伍故雖倉卒遇敵而師徒無撓
其為偏裨時每被髮面銅其從騎兵馳突賊陣羗人識
之見則辟易無敢當者嘗中流矢創甚聞寇至裹創而
行帥不能止公器度深遠今相國韓公故資政殿大學
士范文正公之為西帥也公皆隸其節下咸竒之曰此
國器也文正嘗以左氏春秋授公曰熟此可以斷大事
將不知古今匹夫之勇不足為也公於是晚節益喜書

史既明見時事成敗尤好節義其在涇原也副起居舍人知渭州尹洙與公同經略招討安撫使事洙字師魯有文武才略博通古今公與慮事尤為精密師魯嘗稱公古之名將無以過也公於交游在亡不渝師魯後以貶死公厚卹其孤如至親焉文正既沒其子純禮服除還臺當蒞吳中市征公首為啟陳得署河南賓幕以便墳壟識者稱之其徙真定也過家上冢還謁縣長步趨令庭以脩桑梓之恭然令不敢當議者重其得體遂留

里中與故老釃酒相歡揮金而去其征蠻也上親餞於
垂拱命釃者數焉當是時充國太夫人侯氏微疾公朝
服而入戒家人無得言治兵事第云奉使江表故得不
憂其純孝如此公好以衆整又能分功與人而令在必
行故師之所過秋毫無犯其為小校延安也大里南安
安遠之功初不自言物議多之其征南也今觀文殿學
士孫公時經制賊盜與公偕行其軍中之政公實專之
至於南夏經久之制多讓孫公裁處談者嘉其謙挹初

廣西鈴轄陳曙以步卒八千潰於崑崙關公至推首道者殿直袁用而下并曙誅三十一人其下股慄遂能一戰而成大功公歷官自三班差使殿侍還左右班殿直侍禁閣門祇候通事舍人西上閣門副使正除秦州刺史遙領惠州團練眉州防禦使保大軍兩使留後真拜彰化護國軍節度使職事自指使遷延州西路巡檢鄜延路都監沿邊都巡檢涇原儀渭兵馬部署遂摠禁旅歷捧日天武四廂都指揮使步軍殿前都虞候步軍馬

軍副都指揮使其為兵馬部署以涇原部署知渭州真
定部署權定州鄜延路經略安撫使知延州皆著能政
一拜宣徽使再踐樞密副使遂總機政以兼相判陳州
臨民統軍未嘗少有差失其征羗平蠻名震夷狄勲在
竹帛近代之良將也公娶魏氏封定國夫人五男長諮
西上閣門副使次詠東頭供奉官閣門祗候諫諍皆內
殿崇班說東頭供奉官不幸以夭二女許嫁而未行孫
璋左侍禁璫尚幼同產兄素右班殿直兄子五人詢左

侍禁閣門祇候誥左班殿直諲諄訥皆左侍禁從父兄
靖右班殿直其子詳右侍禁嗚呼戎夷旅距之際公悉
力捍禦以至平定宜享遐福而稟命不融後世其有興
者乎公薨之年歸殯京師明年卜宅西河之太平鄉劉
村里又明年二月十九日襄事太常誄行考功議績百
僚僉允乃賜謚曰武襄詔給本品鹵簿送至都外啟櫬
掩壙並輟其日視朝仍詔所經道發卒衛送葬所州縣
優假人牛車馬特恩也其孤諮等既已礱石樹碑神道

之表以靖嘗從征南復謁銘以志幽遂銘曰

天生哲人 康濟斯民 不有屯難 何展經綸

眷言平夏 奕世稱臣 一旦陸梁 邊鄙生塵

公之忠勤 威名冠軍 近關遠略 歲策其勲

寇入蕭關 卽鎮涇原 圖形以進 百辟改觀

入董衛卒 風清禁屯 出搃邊兵 霜凝塞垣

乃建高牙 以肅和門 延登樞府 式贊治源

蠢茲僂蠻 輕去巢穴 陷邕園廣 圖據全越

公之善籌 成於廟謀 願得奮行 馘彼兇酋
帝念其誠 俾公專征 嶺海之區 僕公以寧
收復邊城 綏撫遺氓 南夏再平 繫公之靈
露布傳呼 歡聲九衢 曲赦嶺表 德音江湖
乃陟太尉 乃尹河中 陞提機務 言疇厥庸
樞極之柄 兵戎大政 弼諧有託 方隅以靜
致主推誠 辭權戒盈 乃錫相印 以鎮陪京
天胡不仁 奪我勲臣 上心嗟憫 悼往撫存

輜車孰引 發卒三川 銘旌改寵 國簿宣恩
佳城何在 汾河介山 勲書彞鼎 家象耆連
山西出將 天下稱賢 功名不朽 億萬斯年

宋故兩浙提點刑獄尚書度支員外郎林公墓

碣銘

并序

公諱從周字某其先西河人問禮孔子顯名諸侯七世
祖自南安徙居潮州宗族盤互為海陽著姓曾大父諱
某大父諱某邱園賁素咸以冲曠終焉父璩少以節惠

稱於鄉黨復謹義方訓子遂起其家四進秩太子洗馬致仕公即長子景德二年由進士上第勅除泉州南安主簿郡以符召為掾日持手板與刺史廷辯曲直凜然有國士之風主計者聞其才俾莅劍州銀冶半歲入銀銅七十一萬第其最以聞天子嘉之擢授大理評事究權永嘉復以課遷本寺丞知開封考城縣遭母喪解官柴毀過禮閭里指為標準服闋又丞殿中勾當諸司糧料院大司徒王公欽若鎮餘杭奏辟公為副詔授太常

博士通判杭州軍州事司徒故相長於智術處事與朝廷約束不能無異同公悉力牽挽歸於繩墨而後已司徒公初怒中悔命一府惟公之聽入朝久之以屯田員外郎充開封府推官議不已同錙銖不移事或聞上帝獨可公奏尋轉度支員外郎提點浙江東西刑獄公事以天聖三年五月癸巳卒官享年五十一公孤進以材稱故自南安二考特轉京城官非列也司徒公之出鎮精擇本朝望士為佐故內閣段公少連時為觀察判官

耳公乃通判其府事無鉅細一決於公初大司徒與丁
晉公謂久以勢位相傾俄而棄節於洛得罪其嘗所厚
者悲坐左遷公在餘杭以抗直不黨聞於朝故得免戾
然亦格不用晉公敗乃為天府佐司徒再秉國鈞猶以
前佐郡時持正不能屈終亦疎之在府三年凡易四尹
太后帝知名而終不遷止以平例外補遂卒豈命也哉
公性耿介不容人私京邑浩穰壓於權貴請託不得循
理可否公銳意痛絕私謁所得權貴人翰墨都不省視

至夕聚而焚之由此勢益失上初即位富於春秋莊獻
皇太后五母一垂簾御長春殿共斷天下事故事大尹
上殿職官一員同陟殿陛與大尹東西立黼宸前腰笏
對展奏牘聽上裁決一日奏事退莊獻指公語上曰此
林某也近侍咸聞焉公之奏事常出文法之外故兩宮
多之府民有殺其兄之二子以規其財者長被瘡即死
其幼走以免事發獄成以母年八十法當留侍公乃建
言使無狀子居母側以凌其幼孤必無全理且孤孫雖

稗亦能為祖母養留之惠姦不可贖奏未畢太后遽頷之曰人情當如此即命配海外公之持平固執皆此類也其在南安考城之政至今民歌頌之故天章閣待制劉公隨考城人也嘗與某言王府屬邑多以材望奏請然自公罷去二十餘年耆舊言父母官無及林公者聞公亡時或至霑泣其政感人心如此公屬文不苟為華媚遣言指事必根政道再獻賦頌悉以規誡為本上亦再以手詔褒之公之第五人其長曰從善先公卒次曰

從式次曰從慶次曰從義次曰從道皆良士也上之初
奠玉於園丘也公以府僚侍祠例授一子出身公之二
子皆白身未仕獨念母弟早亡嗣續未光遂先奏其孤
以慰藉之言行義者咸共推伏公娶鄉里張氏封清河
縣君公之存以婦順助其內公之沒以母道嚴其家宗
族奉之如師保焉生二男三女長子東喬光祿寺丞次
子東美舉進士長女嫁大理寺丞許因其次女封德安
縣君幼女嫁進士魏庚孫幾人公之卒也弟從慶及其

孤扶其柩踰閩嶺以歸而洗馬府君亦以其年四月壬戌卒遂以天聖五年某月舉二喪同域葬於某鄉某里某原妣曰臨穎縣太君鍾氏前葬某鄉某原卜人曰吉遂不克祔某幸得娶公中女公既窆十五年乃克拜於松楸之下於是聚其族姻詢訪遺懿在人之聞者書之於石以為表云爾銘曰

鶉火耀芒 重離協光 下生俊傑 發為端方
俗尚軟熟 視如堅剛 君子居之 不易其常

仁義內脩 我知克舉 爵祿外至 委于所遇
萬乘知名 身猶齟齬 才乎命乎 天不兼予
未伸明謨 弗克中壽 善之所報 將在於後
惟石言言 立於松阡 直書不文 庶乎長存
宋故屯田郎中黃府君碑

府君諱仲通韶州曲江人本名正以犯從祖諱遂稱字
馬家本寒素刺史潘公見之曰此奇童也命其父使從
學及冠以辭賦知名場屋間天聖初進士擢第累授信

州大名府司理叅軍時天章閣待制王公汾主河北漕
上言引濟水御河澆灌懷衛民田辟府君為衛州推官
以通水利秩滿故丞相沂國文正王公岐國正獻杜公
交章薦之詔改著作佐郎監廣州軍資庫未幾遷祕
書丞知南儀州以病乞換江南監當徙監宣州商稅按
察使以歙州興賦獄訟繁夥請擇材士共贊幕畫就除
太常博士簽書歙州判官公事尋賜緋通判建州知惠
州累遷至屯田郎中懷蠻之寇廣州惠最為近府君增

堞濬隍民用以安監司以勞聞及罷惠州也年六十八
矣廼歎曰鍾鳴漏盡而不知止者滔滔皆是也吾可以
去鄉里而貪進乎遂不復朝朝廷授一子官而致其政
以寵之休官凡六年以嘉祐四年六月丁亥考終命於
曲江里舍享年七十四府君少勤學家貧無書手寫細
字五經注疏及文賦數萬篇暨登第後性復恬素不急
進取每歎祿不逮親所得之俸常均給兄弟及諸親之
貧者鄉閭無不服其悌朋友未嘗與之忤當官以幹稱

治獄以恕聞其所薦舉皆當世名公鉅人而所享名位不盡其材壽終之日家無餘資第以清苦自立真全德者也曾祖諱烜祖諱嬰贈職方員外郎妣欒氏累封真陽曲江南陽縣太君凡再娶初曰劉氏封中山縣君太常少卿賽之妹也次曰楊氏封福昌縣君三男子長曰亢早夭次曰佺期太廟齋郎次曰安期試祕書省校書郎其年七月姪新湖陽主簿寶臣太子中舍新知潮陽縣事汾與諸孤奉其柩葬於豐樂鄉之鄧林山靖在諸

甥之列幼授師訓居同里舉進士同榜宦遊險易未嘗
不相親也及府君之傳政而歸也靖適經制蠻事不克
還鄉以奉朝夕之驩暨茲去世又不獲歸奠葬不及執
紼其痛豈有涯哉廼附銘以紓恨焉

韶州相水 南國之紀 生是俊明 具茲粹美
學必根道 祿不私已 幹聞朝廷 悌稱鄉里
籍未引年 志先知止 沒無餘積 清白而已
始終一節 古之君子 佳城何在 鄧林之趾

九原何從 文獻斯邇 身雖可殞 名不泯矣
我懷舅氏 生同榮悴 今也云亡 莫親含殮
握筆誄德 臨紙撫淚 終天永訣 此情何寄

故尚書虞部郎中致仕李公墓碑

公諱虛舟字公濟贈吏部尚書諱寅之季子工部侍郎
諱虛已之介弟李氏之貴於天下舊矣七世祖諱昌始
居光山同郡王氏之王閩越其孫諱盈以族從焉遷徙
名數於建安曾王父諱瑄王父諱詢贈大理評事先君

尚書筮仕江左為諸司使時太夫人在堂以道梗不克
迎奉安輿乃留中饋與公同侍晨夕及秣陵歸命例授
殿前承旨既辭冗秩不受且以嘗為王國官不許南度
其後數年登進士第授衢州理官乃克迎侍公時已能
力學有稱矣咸平中舉進士不第繼丁艱疚柴毀過禮
廬於墳側自力封樹旦暮泣血六年除喪尋以兄任補
郊社齋郎調授福州閩清洪州靖安尉咸著治聲遷饒
州餘干令坐不覺獄中殺人免官會元昆二卿分司還

第公素篤友愛喜於開適且厭夫惡直醜正世路風波故終日怡怡無復仕進之意元昆既沒朝廷以恩授校書郎知江州瑞昌縣事讓不受署友朋敦勸其守益堅杜門家居擯去人事故相國臨淄元獻晏公天聖末為三司使脩姪壻之恭寄書叙意勸公一至京師重違其言乃具私車而往于時上宰許國文靖呂公恭豫文惠陳公簡肅薛公文康王公咸欲畀之大邑固辭不就元獻知公之節不可屈也亟言於上得太子洗馬致仕既

而元獻入謝上與章獻太后問公之年曰六十二矣疾
乎曰無疾上曰若然真可尚也名公大臣嘉其高蹈悉
賦詩以寵其歸明道元年遷殿中丞俄以子寬定登朝
援郊祠舊制復增其秩尋改國子博士賜五品服三轉
虞部比部駕部員外郎恭謝大禮進虞部郎中公之祖
妣臨穎太君陳氏母夫人廣平郡太君游氏之留鄉里
也公在弱年奉侍孝謹出於天性家貧無書而假本於
人必手自鈔錄夜則諷誦長為詞章頃出流輩三衢趙

湘有詩名於天下與先公友善且愛公謹厚以其子妻
之後封長壽縣君其令餘干也強宗有為姦利至中人
以死者郡縣莫之能禦公至則明示教約無敢復犯一
境為之肅然其侍兄伯之疾也躬臨藥膳與子姪均其
勞迎孀姊而事之奉以甘膳與婦孫同其恭其傳政而歸
也謝絕公府未嘗一言干人賓朋至者觴豆相歡嘯歌
有節其或泛平湖游別墅輕舫小駟初無導從視之豁
如也自先正尚書以殿中丞納政歸養築室豫章東湖

之陽不出郛郭而有林泉之趣及令兄以小司空分務
閑居公以郎官歸休舊廬再世三賢相繼解組皆年未
縣車而勇於冲退鄉邦人士伏其世德三聖宸翰羣公
贈言金石之刻龜螭相照怙晦之美當代題之子舍以
朝列守藩倅郡雖越在鄰邦犬牙交壤一欲迎至官下
公皆不許由是間還代出以奉溫清寬初自虔州得請
為江浙等路提點鑄錢坑冶以解舍在番陽晨昏非便
乞居南昌就署局事朝廷許之無何遷荆湖北路提點

刑獄三上章辭不允公乃敷迫使行曰定在此矣無以
吾故屢違命既行至部復懇辭天子嘉其誠故不易其
職而徙之江西馬定之吏資當典城矣再為佐官於洪
以便奉養不離左右者一十二年寬既乘驛至自湖北
公曰吾君之恩厚矣何以圖報遂泣下婦孫至公言如
初浹辰公疾病子婦蒼黃環侍而泣公止之曰吾年過
父兄而汝曹各能樹立瞑目無恨矣復謂醫工曰吾病
革矣無諱二子俾集吾事翊日而捐館時嘉祐四年秋

七月二十二日也享年八十九夫人長壽縣君趙氏孝恭以事長慈惠以逮下勤儉以治內和柔以接外六親稱道用為規模先公八年即世子男三人寬司勳賞外郎定庫部員外郎實祕書省正字伯氏以吏幹發聞仲氏以詞學知名季則早夭女二人長適進士劉好禮次適烏程縣主簿張次道孫二十五人曾孫十五人咸潔身承學無墜訓言自夫人之喪也公豫為壽器又甓雙壙而虛其左以自待也達生者歟以明正月即葬其地

曰新建縣桃花鄉新里村之雷岡前墓之期司勳君伯仲走僕荷書且奉遺意不遠數千里見託銘勒某分義素著於公父子之間故知公履行尤熟公之純孝著於稱節雖父兄在遠而力養祖母勤劬自立及其宿官則清白無渝蓋之剛正自餘干非罪免歸即高謝世務宰弼諸公力共敦勉所守不回以遂初志崇尚節義門無雜賓待人以誠動有儀矩雖宴笑終日不見惰容令子重孫誵誵侍側朝夕訓誨莫非禮法端居靜默三十

三年國家崇貴邱園頻繁爵命而家庭譽處陶然物外
年逾八十視聽益明親舊書疏皆手自我答字體謹潔
可愛少者殆不能及有疾一日而終同於寤寐古之稱
隱君子者無以尚之可銘也哉銘曰

李氏三賢 奕世清德 矯矯八座 儒林之特
辭榮歸養 冥鴻奮翼 皤皤二卿 憲臺司直
厭劇就閑 伐柯攸則 惟公之生 耿耿遠識
承家孝愛 當官強力 何彼蒼蠅 變我白黑

冠之一免	無復彈拭	兄弟怡怡	何喪何得
墨綬再紆	機心已息	友朋勉勸	宰司勤飭
一志不回	牆東晦匿	乃秩春宮	于歸江國
高謝世紛	不為外惑	北窓笑傲	衡門靜默
朝黻屢加	角巾靡易	子舍班朝	朱金滿側
更省迭侍	仕途景式	進退忘懷	死生非戚
豫為壽藏	虛左自適	古稱達人	今見其迹
清風遺後	子孫千億		

故虞部郎中李公墓誌銘

嘉祐四年秋七月甲寅尚書虞部郎中致仕李公終於
洪州私第既卒哭二孤以書奉其遺命并門人錄其善
狀且告葬期請誌諸方石使還復之以辭公公諱虛舟
字公濟五世祖諱盈從王氏入閩始占籍建安曾門諱
瑄大父諱詢贈大理評事大母陳氏追封臨潁縣太
君考諱寅殿中丞致仕贈吏部尚書母曰廣平郡太君
游氏初先公尚書仕江南壤斷不克迎板輿故廣平君

及公並留侍江南平先公辭冗官且以故國臣留居京師後由進士及第調衢州司理叅軍乃克歸先公之未歸也公自能力養咸平中進士舉不第以兄任補郊社齋郎調福州閩清洪州靖安尉寇攘以息遷饒州餘干令公事去官時兄虛已以工部侍郎分司家居公以天倫友愛不忍離去遂絕仕進意兄終朝命起為校書郎知江州瑞昌縣辭不受天聖末三司使晏公殊公之兄子壻也迎公至輦下宰執諸公欲強之仕不可晏公為

言於朝乃授太子洗馬致仕年六十二矣兩宮嘉數中
外聞之六增秩至虞部郎中賜緋衣銀魚自先公尚書
致政還養卜居豫章令兄貳卿及公悲以怙退歸居其
歸則元宰碩儒縉紳文學之士著於序詠碑刻存焉其
居則面湖築室涵虛構閣無城市之囂有林泉之趣公
高謝人間絕迹公府資給先疇不管什二之利潔約自
守未嘗以私干人賓朋過從弦歌取適而已不為過分
之樂不雜泛然之交家居三十三年二子垂朝紳佩郡

印趨庭侍側者十五餘年寬為司勳員外郎提點江浙
鑄錢坑冶即家署事二年遷荆湖北路提點刑獄以違
遠庭闈五表固辭換江西如其職定為庫部員外郎嘗
知南康軍矣再乞簽署鎮南節度判官通判洪州凡十
餘年不去左右孝愛高潔奕世可稱其難繼矣夫人長
壽縣君趙氏廬江尉湘之女先公八年而亡自夫人之
亡公即其冢旁為窀以自待也公終之年八十九矣以
其年十二月甲申合葬其藏即新建縣桃花鄉新里村

之雷岡也三子其幼曰寔秘書省正字早夭二女長適
進士劉好禮次適烏程主簿張次道孫二十五人或為
邑長郡掾矣曾孫十五人諸孫皆好學保家者銘曰
公之先世隴西入於閩家建溪尚書公
仕金陵公留侍孝蒸蒸令餘干民治安
非罪去不再冠秩春官歸於洪繼先德
避牆東無苟圖無妄干朱紫侍節義完
今已矣塋新里李氏也視章水

宋贈大理寺丞朱君墓誌銘

并序

君諱信其先邾人戰國時并於楚漢初以任俠聞季布歸之以解主仇名熏灼於天下孝武徙山東甲族實諸陵遂移名數長安雲自平陵以峭直顯名博居杜陵以材敏稱職為漢名臣馬世祖南陽浮與祐俱自南陽為佐命晉宋之際齡石以權勇輔義集勲疆場世有英特發聞京輦唐室之季遂家大梁今占籍開封府陽武縣戶牖鄉魯祖諱洪五代倣撓仕奎榛梗與道沉浮

不顯驕餌祖諱敬安鄭州別駕生一男一女女適陝府
右司馬贈少府少監隴西李咸秩封河南縣君男諱昭
澤應毛詩學究舉不第早亡即君之丈考也自曾門
以來以氣義自守君以奇節終之河南君之子李公穆
以諫議大夫叅知政事於君為外兄弟終不於此時屈
節一圖進取嘗署計臺右職以勞當遷供奉禁庭矣子
友直明經及第君即自解去從容子舍其淡泊榮味如
此然疎財好義重許可廣交慕其游皆英俊有名之士

也友直歷官至虞部員外郎要津提擢緊君之舊其知人之明又如此卒以子登朝再贈大理寺丞女二人長適孔氏次適東染院副使趙承諤孫男二人長曰濟中書堂後官檢校尚書水部員外郎次曰從政早亡孫女三人長適左班殿直路昭吉其次亦早亡濟字伯仁少孤而個儻多識當世典故復廣交契克紹祖烈卜葬得慶歷二年太歲壬午閏九月二十七日丁酉凡八柩同遷於開封府祥符縣開府鄉東韓村之大瑩君與夫人

吳氏同安朝廷以恩賻錢五萬將葬即以虞部府君之
狀託天章閣侍講王洙撰次其美復以君之狀俾來索
辭濟之遊皆在朝聞人籍籍居顯仕矣襄事孝誠之極
而以文見屬故不克讓乃為銘曰

猗與君子 韜光抱器 進退以道 交游以義
不苟勢榮 不屑祿累 起家有承 拂衣無愧
時人蹈道 身蒙其利 明哲樹善 世福其嗣
烏經卜吉 牛眠善地 銘以掩幽 為子孫識

宋故馮翊縣太君王夫人墓誌銘

夫人姓王氏金陵人也父諱某仕李主為如京使王師
渡江既黜唐命革用其俊授右班殿直夫人徽柔懿淑
克謹女訓自外摠即幹母蠱振闈之內壹以付之其慈
明孝愛出於資性閨門整飭動協儀矩族姻罔不尚其
節焉嘗因季春墓祭出見親之貧者即解衣衣之母曰
衣豈妄得何遽與人對曰紛華非性所適且憐其窶甚
杼軸可完宗親不可携也母繇此益奇之凡四時蒸嘗

夫人必手鑪壹室牢饌醖醴菹腥脯醢潔器異齊以備其物常曰祀享人之大事故須嚴潔以表至誠幼懷異節率皆此類年十九歸於戶部郎中許氏事其姑如其母而加謹焉怡聲下色調膳扇枕雖隆冬瘴暑必躬親之未嘗一委媵妾之手室中舉案侃侃如也姑亡不食三日冒經被線動必以禮其族婦有賢而孝者族人齒之必曰何如王氏其愛慕也如此其與兄伯同居事其姒如姑之存歲入地征月入官奉悲歸兄伯之室簪毫

不以自名嬰孩之費一請於其妣曰世母在吾何敢專其謙讓之性然也戶部府君遠宦十年夫人足不踰閭夫伯俱亡撫養諸孤均若已出聚居且百口恩意怡怡一亡間言訓誨子姪目見成立夫人再封邑臨沂以夫封馮翊以子封享壽八十以寶元元年歲次戊寅十一月某日終於海陵私第子五人偕舉進士長曰恂通州司戶叅軍次曰恢大理寺丞知常州晉陵縣次曰怡秦州司理叅軍次曰元殿中丞次曰平累舉未第女二人

長適虞部郎中知撫州田慶遠次適職方員外郎知永
州張楚孫幾人亦各材俊卜葬得某年月日與戶部府
君合祔禮也某元之執故為銘曰

猗與哲婦 生此南國 始勵柔淑 以植女德

衷勤孝懿 以光壺則 終篤慈愛 以宣賢式

族人以和 母訓以飭 諸子咸仕 出於風力

佳城鬱鬱 義聲亡極

宋故殿中丞黃公墓表

公諱珙字希珍其先楚人春申之後世居江夏或係為
公輔或時號奇童前史詳之此不復叙占名數於衡陽
有年矣曾門諱璠大門諱承祿潛德不顯高蹈林泉考
諱徘徊樂道奉佛中年戒殺遂絕葷血鄉曲稱為居士公
以清素自勵兼通內外典而留意篇詠嘗云聖世右文
興治芳羅寒俊家有令子弟不可不訓之以學而起其
家當是時子姪四人悉趨黨塾義方之教劇琢有成公
喜而為詩曰門闌自有子孫榮章獻太后上僊之明年

二子同年進士擢第越再榜猶子師尹繼捷詞科既而
二子陞朝以裡祀恩及讓官回授五被命至殿中丞朱
衣銀魚湖外嚮儒盛矣德門賢範遂為稱首公嘗謂儒
術以飾躬佛法以理性故其崇奉西教逾於先君誦金
剛般若經四萬卷雖資質方直而好行陰德每以善行
誨人嘗自吟曰但將貧作富祇以道為懷有欲休持戒
無欺便是齋君子謂之知言公以嘉祐七年二月辛丑
考終命於衡之私館享年七十五疾病彌年精爽不亂

其奉行衆善無忘正念者歟太夫人許氏其壽九十夫
人許氏累封長壽縣君內助於公下訓諸子主蘋蘩之
祀著閨闈之則長子師道屯田郎中通判廣州仲子師
說舉進士不第先公二年卒季子師旦屯田員外郎桂
陽監使並承公積善以取科級謹於率履咸以清白材
幹聞大司田君復深於佛性棲心事外有高世之風焉
緣公及夫人年高偕不樂遠去庭闈朝議趨而從之女
適同郡郴州司法李日宣孫五人長鎮次鈞太廟齋郎

廣城啟期錡女孫九人重孫四人重女孫三人以其年十一月庚申葬公於東郊里墅之東五里虎龍山先塋之中方葬有日矣嗣子走其中親進士羅友諒持其郡倅都官莫君及所撰行狀倅來乞銘表於墓阡頃歲某經制廣西大司田君時為桂倅婉謀正論日蒙開益公及夫人皆板輿迎侍至郡升堂獲見折節相歡一日之素於茲久矣及今經畧廣東君復倅南海蓋以便於定省故十年之間連倅二郡不自以為滯非孝誠發中軌

能如此秩滿既歸懼此荼毒湖湘之間豈無文士特緣
雅故見託斯文然雖藻思荒落其敢辭哉銘曰

為善致祥 乃天之常 其身用光 其家用昌

忠恕之賢 後裔綿綿 立石松阡 以永其傳

宋故大理寺丞知梅州王君墓碣銘

王氏之盛於天下舊矣以望別族者秦之郡五漢之郡
一十六公之望實出太原自司馬氏南渡而諸王世為
輔弼梁永寧郡公侍中尚書令僧辯生顓顓生珪唐正

觀中宰相以亮直稱為名臣珪子敬直尚南平公主拜
駙馬都尉坐事貶死嶺南子孫留者因為曲江著姓雖
世襲簪紳不絕而祿卑不得譜於國史曾大父諱某大
父諱當劉氏自即尊號族人仕者皆得美官獨父子幅
巾高蹈不與其餌考諱臨字嘉謀皇朝以鄉邑器望署
潮州司里叅軍卒官公諱式字用之十四而孤耿介自
立以學行見稱舉進士得秘書省校書郎歷廣州虔州
南安軍司理叅軍入朝除大理寺丞知吉州永新縣以

能聞明年移知梅州景祐五年七月卒於治所享年六十五公沉厚方直敦尚名教自幼孤至白首貫以一節舊制嶺表按察官歲調郡縣掾佐闕員取進士再舉明經三舉下入太常第者試攝其事三載不瘵厥職乃送吏部為品官邦人自為南選常才趨之唯恐不及公嘗喟然曰曲江自文獻公後士大夫鮮復以科第取顯爵於朝豈南方以此選誘人為卑耶吾為州黨項領期於展力從官詎宜碌碌齒其間由是自弱冠捧鄉老書遊

塲屋三十年終不屈意暨上第時母夫人猶在堂升堂
拜嘉閭里始歸其高焉今天子初踐祚在諒闇不待祥
禪即臨軒急於採擷天下俊異而曲江聯翩六人中第
皆公之力六人即公及子陶餘若靖輩悲嘗趨函丈焉
郡守嘉尚縷陳其事乞改公所居之鄉曰興文里曰折
桂詔可其奏邦邑榮之三為決曹掾以清慎自守發擿
姦伏滌洗良善期於詳允獄無隱情雖苛吏把其上狡
胥穴其下不敢簪毫奪其理卒以雪枉改官其宰永新

也俗固好訟而當官者復侵渙之公一皆痛刮其弊民
戴之如父母焉公始掾南海遭內難解官在始哀之年
而致毀過制遂以氣恙到梅之三月疾作不及成政而
捐館舍公志尚高潔義不苟合訓子弟有常檢接僚友
無戲言聞人之善談不虛口其不善者疾如仇讎真所
謂古之君子也夫人余氏鄉邦令望明淑賢懿上奉其
姑下撫其族於公內助為多二子長曰陶信州軍事推
官次曰防亦舉進士孫男六人孫女五人皆幼公之初

喪也引柩西還藁葬其郊居之側至某年某月某日以
禮襄事於興文鄉折桂里厚富原以靖幸而交其父子
間兼師友之重使來索銘以表其墓乃銘曰

韶山之秀 發為俊茂 清識懿文 南州領袖

人趨祿仕 不羞苟得 公獨夷由 決於翰墨

五試文昌 晚成之光 三掾決曹 罔私毫芒

明照隱詆 民不冤死 入奏天子 乃丞大理

試政蒲蘆 五柳雙鳧 鋤強息弱 百里以蘇

暮年成績 部符嶺阨 車茵未溫 卧簣已易
旌旄西還 霜淒露漙 福不盈皆 俄歸九原
惟公之德 個儻殊特 身雖云亡 留為軌則
詞學起家 義方教子 有詔旌之 丈鄉桂里
胡為石彥 累世弗顯 才不誰知 卒於遐遠
勢薄地寒 不貴不年 廷尉高門 在於後昆
宋故殿直蘇府君墓誌銘

府君諱繼字傳之其先蓋祝融之裔為周襄內卿士故

為武功著姓唐僖宗幸蜀扈駕而西者徒名數於成都
祖諱厚仕蜀至尚食使考諱進之為蜀牙兵校長蜀亡
孟氏之臣例署東宮官得副率府君以父任累遷殿直
太平興國中授深州安平寨主是時北虜歲擾邊安平
雖名堡障宿兵不滿數百援師不集則禍至常不測或
勸府君辭勿行府君曰平時既食其祿急辭其難非人
臣節吾不耻於死而耻以此生遂寓家他所而獨之安
平明年虜以兵夜襲寨城果以無援遂至陷沒享年七

十五帥臣諱援兵稽期誣以不備敵聞繇是雖死王事而贈典不及吁忠義其難行哉子咸熙南京留守判官孫二人長曰安世尚書屯田員外郎次曰昌世太廟齋郎以嘉祐二年十月庚午並舉王父母考妣四喪歸葬於揚州江都縣興寧鄉馬坊原府君與夫人許氏同藏俾作銘於幽宮銘曰

常人宴安 唯祿與利 君子所徇 曰忠與義
既食其食 夷險一致 履危忘難 雖死不避

守帥蒙上 唯善之救 贈典不加 忠魂無愧
福不在身 在乎來裔 吁嗟九原 古人之繼

宋故南京留守判官贈都官郎中蘇公墓誌銘

公諱咸熙字太和其先胙土於蘇為周卿士故代為武
功人曾門諱厚以唐末翠華西幸避兵至蜀仕蜀至尚
食使因為成都人祖諱進之從孟昶歸朝授東宮副率
考諱繼殿直深州安平寨主契丹犯寨陷焉公以大平
興國八年明經擢第授邠州定平尉會朔易帥耻於援

兵不出痛詆安平失守公緣坐謫澧州未幾義士疏其狀天子憫焉詔釋之調綏州司法叅軍太宗割綏銀界夏國徙隰川尉秩滿遷建州松溪令改宣州南陵母喪去官服除授忻州秀容令州將轉運使以治狀聞遷寧州軍事判官歷單州團練均蘄防禦荆南節度南京留守判官景祐二年七月辛卯以疾終南京享壽七十五公性淳氣直廉謹自守所歷十二官未嘗一掛於法口不言人非其有過者款言諭之人亦信伏常語子孫

曰吾少孤無恃徒力學祈寸祿以養母母終養矣又
得衣食爾子孫吾自足矣豈能以諂言諛色干權貴以
求進乎且貧無苞苴耻學術數何以取合於人吾老於
從事不自愧也人雖不知曾不一露鋒穎真吏隱君子
哉德之積而福不享於身者將鍾其後乎夫人汝氏封
潁川縣太君子二人安世舉進士屯田員外郎廣西轉
運使昌世太廟齋郎女三人長適黃州麻城尉費中
黃次適建州進士吳淵次適合州進士袁務孫五人台


文舉進士永州推官詳文太廟齋郎懿文炳文彥文未仕公初自秀容令赴選奏舉引見例進京秩一夕子壻吳淵夢人呼公為判官及見果得賓幘其從事六州皆為判官公志本恬素及事符夢寐益加退讓焉疾亟之際自言吾夢於城北自擇陰地幽冥所安無累後代又言生平守官未嘗過誤惟邠州一獄有差適夢之帝所辨之得請矣文字在吾懷中親戚恠其謬言就索文字公曰七月十日來看至日果不祿焉及今卜葬之原果

在城北以嘉祐二年十月庚午與夫人汝氏合葬於揚
州之江都縣興寧鄉馬坊里屯田君以靖同年進士又
同官於洪於桂故託銘遺懿以掩幽戶銘曰

學行由已 窮通在命 人貪苟得 公惟守正

內脩廉謹 外絕奔競 識高位下 非德之病

嗣職熾昌 有家克盛 九原可作 百代輝映



武溪集卷十九

欽定四庫全書

集部

武溪集卷二十

詳校官給事中臣李臺

檢討臣何思鈞覆勘

覆校官中書臣呂雲棟

校對官編修臣沈清藻

謄錄監生臣王鉞

欽定四庫全書

武溪集卷二十

宋 余靖 撰

墓誌下

宋故殿中丞知梅州陳公墓碣

公諱坦然字某其先潁川人高祖父效官容管屬唐季之亂嶺道梗塞不克北還遂為普寧郡人曾祖諱某祖諱某考諱某並仕劉氏為私署官考終於知繡州營田事皇朝贈大理評事妣陶氏贈永昌縣太君公即繡州

第三子博學善屬詞有膽勇多權謀尚然諾舉進士未第歸鄉里景德中宜州兵殺守帥脅判官盧成均以叛偽稱南平王擁衆數千人北攻象州成均者公同郡人也公乃單騎行賊圍為書約矢射成均帳下為陳禍福其畧曰國有患難乃見忠良貪人之利而背其君非忠也怯人之威而失其志非勇也君甲科進士當以才識濟理今佐一郡不能撫其衆以至於亂又不能死乃更甘心偽號提烏合之徒剽劫郡縣朝廷封疆萬里帶甲

百萬遣偏師取狂寇如舉太山壓卵耳奈何赤族從叛
人入湯鑊中耶初象城疎弱無守備將陷者數矣成均
得書欲自拔歸順計未決而王師至城乃全賊又別遣
一屯分掠南路徑趣容境所至摧陷公入語容守陳延
賞曰賊勢剽悍難以力競且脅從之人本無戰心願假
倚兵數輩見從抵賊營論以逆順當使解甲而歸我矣
公去賊壘數十步下馬直前為言本朝正朔被四海汝
徒無故譟聚今有詔止誅首惡苟能束身改圖自當榮

以爵賞何苦草間覓活是時賊中偽補屯衛之職陳賈
二率私相語曰此飛檄生也於是率首領以甲卒數百
詣郡降賊失腹心皆不戰而自潰矣賊平論功大將以
狀聞中旨令本郡救遣赴闕與官仍賜錦袍銀帶公悉
讓而不受願回前恩以就殿廷一試朝命嘉之詔貢部
別名聞奏中途被病且遭家艱以歸服闋急於祿養攝
主化州吳川簿秩滿調授杭州餘杭簿擢漳浦令再以
吏能佐桂州幕初為節度判官以母喪解官後以觀察

支使知春州入朝遷著作佐郎知潭州攸縣移知梅州
累轉太子贊善大夫殿中丞卒官其佐餘杭也市有丐
者杜氏夫婦皆八十餘杜氏名暹嘗為忠懿王幕府官
老無子孫遂乞於市公聞之惻然為輟俸錢構草室數
楹以居之語同僚暨右族合幣二十萬與其足日廩市
什器營壽藏識者義之其令漳浦也有海口石門居風
衝道歲壞舟楫甚衆公乃相地徙港以避濤怒商旅至
今賴焉邑西有陳將軍祠者郡圖云儀鳳中勲府中郎

將陳元光也年少強視邦人立廟享祠甚謹日奉牲幣
無算歲大旱偏走群望弗雨公乃齋潔詣祠下禱云政
不脩者令之負禱無驗者神之羞國家崇祀典所以祈
民福也祀苟不應何用神為即鑰扉與神約曰七日不
雨此門不復開叢祠為燼矣行未百步霾風拔巨樹仆
於道俗素信鬼及是吏民股戰神之怒公徐曰民方替
何怒之為乃援轡截樹而去果大雨田收皆倍邑人刻
詞以紀其異其在桂林也役徒不足借禁卒五百伐材

以脩守具郡帥會賓客飲於堂外有告變者曰役卒二百挾刃羣譟入屯營為逆在座相顧失色郡帥曰當閉城以虎翼五百擒之公即屏人語帥曰今以亂擒之彼知就擒則死必力鬪適所以堅其叛意耳及其釁尚淺君誘而致之可無患乃從白直數人直趨其屯責其主校苛刻乃復人人恩慰問其勞苦叛卒環泣曰苦則思亂人之常情若從公命得免於役以全視息為再造矣皆釋仗隨公而歸帥亦原之其罷陽春也有張氏女者

父為供奉官夫吏輦下犯賄流嶺南夫死家屬當還都邵陽郵卒以刃脅為婦留且半歲公經途聞之執卒送官抵罪公解縣贐萬錢貽之官遣部送還其父子皆章章在人視聽者也公歷七官幹局外職司符牒効事凡九十餘獄民無一辭為怨其周才也如此公之宰攸縣也政無不草乃經度署表而鼎新之落成之日而詔書至徙梅州心常戀戀焉捐館之夕攸之宿吏數十見公朱衣垂魚據鞍導從暉暉入門升廳如平生廳簾墜地

如割衆驚異之後半月而玄問至邑人塑其像立祠於
邑西云公以明道元年四月甲辰終於海州官舍某年
某月某日歸葬於某夫人楊氏祔焉楊氏先公早世子
六人曰直方有方知方居方義方應方居方舉進士有
方補郊社齋郎為曲江簿亦能官義方應方尚幼女二
人長適某康定元年曲江君因方跌圓首之令泣以遺
狀來請銘嗟其名不書於史氏遂銘曰

古之為吏 不專祿仕 器能軼羣 名不墜矣

後之為吏 去才取位 官品不登 善斯委矣

吁嗟陳公 識優命否 勒銘幽石 以頌遺美

宋故禮賓副使知邵州卞府君墓誌銘

公諱日華字某曹州冤句人昔武王既克商崇樹親親
藩屏周室母弟振鐸建邦於曹詩存國風譜在史簡別
子之為大夫者因食采之邑命為卞氏仲尼稱卞莊子
之勇蓋曹大夫魏晉已降粹壺世繼清德兄弟六龍並
登宰府鄉邦墳壟至今存焉蘇峻之難壺為航東都督

王師不利父子俱殞義士嘉歎國書褒義以為忠孝之道萃於一門英風凜然千古所仰曾祖諱某舉進士不第終於家祖諱某用卜河南之術以豐其才羊畜帝叫滿野而不尚豪汰淡於榮味卒以素風自樂考諱某專經成名以廉謹稱丞相太師呂公蒙正丞相太尉王公旦咸加慰薦歷潭州決曹掾卒官累贈比部員外郎公幼孤個儻有奇節初修進士業衆推強記以善詩著名既而曰吾母戴白而恃吾養豈宜博習以自私於名當

就速成之術冀得祿以為親榮耳乃夙宵砥礪專誦春秋經傳數十萬言果以明年一舉登第解褐除陝州平陸主簿惟陝郊雖名近輔而介在崤澠之間被山帶河盜賊據為囊橐負甲持矛以剽掠為業者歲常有之公到官權摠尉事境上強寇朝廷以名捕者十三輩於是訓練爪牙多設籌略悉擒之亡唯類府以狀聞太宗覽奏大憚時廣西溪洞反側始安方擇守以綏之即日降旨急召赴闕廷見之日德音獎勸擢授大理評事知賓

州軍州事即淳化四年也俄而交趾犯境專詔陳公堯
叟調度兵食安撫南鄙秦公治績尤著有詔特記姓名
別聽任使居無何永熙升遐真皇登極例進秩光祿丞
權開封府掾尋遷三門發運判官將漕最進承大理仍
領漕事咸平三年以北虜未賓詔文臣有方畧者許兩
府薦名或投牒自舉公自計理效恐見推擇若王命臨
門則不得以親為先事陳之遂表乞解官侍養朝旨未
允太夫人果即世居喪不勝衣景德二年服闋叅政尚

書趙公昌言援前詔舉公右職上使人問曰朕下詔急人時不自進若後之矣公對曰昔之不敢臨桴鼓以親存也今母亡能葬得以捐軀報國臣無所讓上嘉之遂除內殿崇班知博州恩賜加等三年河東用兵移忻州宿弊未剋力欲繩政遂為姦人中傷左授考城兵馬都監明年徙太康天子東封之年改內殿承制當是時太尉馬公知節知樞密院事屢稱其材上亦記之遂授禮賓副使知邵州以大中祥符五年十二月壬辰終於官

舍享年五十二州民為之罷市而行哭公性端方守名節敦信重義孝愛尤篤自筮仕至於投筆率以親為進退家之積粟周贍族姻而俸祿盡於賓客捐館之日室無羨資兩朝遇知己之主不克壽而展其才可嗟也已公之兄楚材今為春官舍人弟日就舉進士景祐初釋褐未官而卒季弟日新亦舉進士公娶某氏封某縣君生一男一女男世長右侍禁恪勤以涖官飭理以檢身咸有所稱以守先訓孫二人尚幼初公之喪也侍禁君

羈貫既扶服以柩歸而厝於郡郭今乃卜以某年某月
襄事於大塋禮也嗚呼卜其兆宅而安其體魄又能論
謨懿義以為子孫識皆孝之大者塋而有銘古也乃銘
曰

曹大侯邦	卜乃公族	賦邑命氏	并蒙其福
他姓真居	數世則遷	卜守本國	其紹綿綿
公之翼翼	生子積德	傑然起家	實惟茂識
一尉之卑	遽為帝知	抱器遭時	當代所稀

親存守常 以養其志 親亡激節 有死不避
進退之儀 必本於義 行道固難 卒多留滯
稟命不融 半途而隕 清名有餘 高才未盡
九原蒼蒼 體魄所藏 子孫不忘 以嗣其光
宋故贈度支員外郎張府君墓表

大宋嘉祐四年冬十月蘭臺丞張君奉其先正度支及
母兄之柩歸葬於青州既襄事泣而言曰唐民不幸父
兄早世久在旅殯常以為無涯之憂今幸而安厝宅兆

以釋重負又幸蒙相國韓公翰林歐陽吳二公紫微范公見貺誌銘御史邢君筆於方石納諸幽室相國觀文梁公復揭題詞鎮表兄墓今先君之封欲表樹銘勒與兄無窮敢丐詞焉謹案府君少而業文晚廼得第事親以孝行著立朝以忠實稱其居官政必興民利家庭儉約兄弟友愛自嘆衰晚所志不就力教三子期大其門元子唐卿舉進士果為天下第一仲曰唐輔亦同時得第雖相繼凋落不副國家旌用之意然士人翕然稱其

賢於教子也其季則祕丞君復以召試成名致位於朝
及居母喪竭力以圖窀穸之事環走數千里負載數柩
歸葬舊鄉又能以誠感當世賢相名卿之丈以誌其墓
張氏真有子哉噫世之所重惟在仕祿賢人君子則不
然視才德何如爾仕祿外也故不可必彭殤不足較其
脩短顏稷不足較其窮達死而不朽者為名而已世之
言教子者府君為無愧矣府君諱思字希聖進士及第
官至太常博士以子贈度支員外郎曾祖諱庭實潛德

不耀祖諱昂贈職方郎中考諱從化駕部郎中贈祕書少監母朱氏贈河南縣太君其世閥官績歐陽翰林書之詳矣嘗葬其宗親三十餘喪其子既登科即致仕而乞官其弟愈表聞未報而終云今葬於廣固之仁德鄉先塋之東奉遺意也係而銘曰

士之處世 才德居先 窮達壽夭 歸之於天
義方訓子 魁於俊賢 德之無愧 福胡不堅
其季有立 還葬舊阡 維名無窮 子孫萬年

故蕭府君墓誌銘

并序

府君諱陟字希陞其先潭州瀏陽人五代祖展初仕湖南知馬氏政哀乃挈族去其國以歸江南李主大悅賜田十萬家於新喻今占籍臨江軍曾祖處鈞祖著父質皆潛德不仕府君舉進士天聖初今上諒陰不親臨試以恩例授袁州司士叅軍再移潭之醴陵岳之華容尉權岳州司理叅軍治獄以明恕稱岳陽介居荆湘重湖之上號為名盜捕寇者利於功賞因緣為姦往往閱舟

有兵器貨財者榜笞係繫誣為抄剽械送郡獄府君夙宵研覆辨其枉直平反者百餘人岳民至今思之權臨湘縣事政亦有聞鑠廳進士舉賢良方正制科不第調授泉州同安主簿未幾得疾卒於官舍享年五十八府君博通古今好讀書其赴同安也駕囊裝鞍馬得錢百千盡以買國子監書喜形於色曰吾無資產以此遺子孫乃家寶也常枕藉於其間曰此生無成當有施於後世府君娶簡氏先府君卒追封旌德縣太君二男長曰

注次曰伯英府君臨終之夕呼二子囑之曰吾昔為獄
官有陰德於人吾聞有陰德者其後必大汝等當力學
圖富貴以大吾門二子果皆擢進士第注今為西上閤
門使廣南西路安撫都監兼知邕州伯英祕書丞初儼
外蠻儂智高攻陷邕橫等十郡遂至廣州據民鄺園府
城州將不知所為第率官屬吏卒上門登陴而已上閤
君時行番禺令事縋城獨出募勇敢士抗賊之謀焚其
舟數百艘得其所略婦女數千人又殺鄉坊之民與之

交易者數百人日開南海門運食物及守禦之備以資城中賊智力皆窮乃退去朝廷嘉君功特拜禮賓副使知邕州賊之敗走於邕也君又募溪洞酋長說誘諸蠻擒賊之母及其子弟於特磨道生送赴闕戮於都市吏落聞其名皆畏之由是累遷官而久其任焉府君累贈至屯田員外郎祕丞君亦以同在蠻中經營擒賊之策進京秩知新喻縣事蒞官之明年遂謀以嘉祐五年二月二十八日葬府君於本縣之月邱祔先塋也女三人

孫五人曰元曰充曰堯曰几曰允元充悉以恩授太廟郊社齋郎几允尚童幼葬有期矣以書來丐銘府君之德銘無愧辭乃銘曰

懿文不達 清德可尚 多積諸書 以敵珍藏

治獄之仁 當大其門 如茨福祿 在其子孫

馬處士墓表

慶歷四年春正月丁未鄱陽處士馬府君歿於私宮冬十月其孤遵泣血緘書走京師索銘以掩其壙不及窆

期廼表諸墓云謹按馬氏於戰國為趙將於漢為外戚
於唐為功臣章章然在史矣唐季遠祖避地自黃梅渡
江占籍於饒之樂平曾王父諱昭王父諱亮並署於南
唐父詡夷曠不急於祿而終母曰某氏實生府君諱某
性深沉博涉書史不專章句之學少失其親柴毀過禮
州閭稱之恩撫同產及同宗以同居僅百口怡怡如也
鄱陽近寶其俗任氣鄉里之有爭者府君以義譬解之
人服其評之允不之官司者十六七居家喜賓客而加

禮儒士撫七子皆有成年五十七娶董氏府君撫其宗於外董夫人扇其和於內七子慶巡遵喬寧道迅悲自樹立嚮學遵登進士甲科入朝為太子中允以幹材通識見稱於時道舉進士未第初中允君以廷尉評為晉康守懲其邈於晨昏也期不遠去鄉國被吏書至闕下二年得宣城通守以歸又家居且一年朝廷以邊鄙宿兵培克吏浚民以濡國不恤其怨而仕路混淆久未澄汰力選直清通濟之士分外臺以佐邦計遂自大理

丞換中允為福建路轉運判官將勉奉安輿以行而府君即世遂以某年某月葬於信州弋陽縣某山某原於戲府君以仁撫其族義訓其子鄉邦欽尚而壽考不堅天道損益不可原乎天與其德不與之年賦有所偏乎不豐其身將大其門乎不見其人永瞻松阡悲夫

宋故大理寺丞前知白州孫公墓表

君諱億字廷齡其先周文王之子康叔封於衛為諸侯衛武公之孫食采於戚曰孫氏世為上卿楚有叔敖三

仕至令尹封於寢邱號為循吏漢有堅父子開國於吳
以有江淮故其世系繁衍於南方而望於富春之族土
著於袁之分宜曾祖某祖某考某累葉高蹈恬退自守
君幼挺奇節資性溫厚博覽廣記不為章句之學弱冠
能屬文舉進士上第選注桂陽監判官虔州節度推官
薦其材者章交公車擢授大理寺丞知吉州永新縣徙
知白州丁先府君憂服闋符召還臺道卒於宿州享年
四十一桂陽地產五金諍盜日積南康土沃民繁郡多

滯訟君連佐二幕率以和易守職進則啟迪嘉謀以裨
邦君之闕退接民吏一無異言故直道得行而上下悅
之其宰永新也予時忝典城之寄共為親民吉民歲配
和市縑素六萬餘匹主外計者籍收帑錢以供他費第
給海鹽償其縑直前政又以邑豪入粟得爵者准官戶
免其征細民由是重困君發其弊予得奏停邑官且藏
鏹於縣以酬民縑外臺不能詰告之田租歲收四十萬
斛必擇廉幹司庾之入漕臣意在聚歛預戒庾吏定收

什二以充羨餘專其局者惟君能守州約拒臺命出納
一用倉式其公正皆此類也俾其克壽而貴善政豈可
量哉其居喪也不歷姻婭之門不知鹽酪之味三年無
改邦域稱焉君初以藝文知名故樞密成紀文憲李公
諮特加稱賞妻以兄子實多內助生二女三男長女適
李氏予以弱息仲荀娶其幼女男之邵之翰之問皆未
冠君以皇祐元年四月二十九日捐館舍於扶離諸孤
扶其柩歸以其年十二月二日葬於分宜縣某鄉某原

其弟洧以書來索文不及掩壙之期故表諸阡而銘曰
天生吉人 付之正性 胡不與全 而薄其命
瘠賢肥佞 亦天之病 表諸墓道 以圖惟永

宋故光祿寺丞梁君墓表

梁與秦趙同祖絕於秦續於晉顯於漢故為京兆萬年
人祖諱昊佐幕番禺屬劉氏據有南海耻非王命不從
所署道於東莞世歸其高馬二子長曰光運署右職捕
賊遇害少曰光遠即君之文考亦佐戎政皆劉氏官也

君諱頤字微之幼秉奇節強學篤行信義稱於朋友詞
章秀於鄉邦國家削平僭偽統壹函夏君即占籍高要
以從鄉賦舊制嶺南按察者皆專選補州縣吏員闕即
擇前資及士之豪俊而署之試守三歲克有成效則薦
於吏部而授真秩君以故事召署湍三暮調於天官得
象之武仙簿貴之鬱林尉封之司戶叅軍悉以能官有
聲年及懸車抗止足之分移疾請老朝廷美之遷光祿
寺丞致仕以景祐元年六月考終命於封水享年七十

三夫人陳氏先府君二歲卒其孤揆繼歲銜恤遂蓬首
垢面挈畚負土由祖妣而下封大塋而定之凡六墳異
藏同域以景祐二年十二月辛酉掩壙於端州高要縣
歸仁鄉湖洲原乃築廬居家旁朝夕哭泣刺手取血寫
佛書以祈冥報廬外植蔬樹栗以給饘粥不茹葷血凡
六歲乃除喪州閭耆舊緇素以其狀白長吏表聞天子
嘉之詔郡縣以時存撫賜之粟帛以旌其孝專選補者
以揆至行奪而官之窘於窮而從焉慶歷五年十月患

舊域卑濕仍負土全塋徙瘞宗崇原加封樹焉從高顯
也既而乞銘以表之銘曰

哀無時而忘 服有時而終 去廬立表 以寄哀
於無窮

宋故國子博士通判太平州毛君墓銘

公諱應全字子貞其先滎陽人昔者武王翦商而造周
以介弟毛伯既親且賢乃列地而爵之與康叔居闕東
為諸侯與聃季入冢內為卿士胙土得姓善善相繼其

後領袖儒林丹青史筆者代有之矣玠仕魏為尚書僕射以清公廉節自任後嗣仰之為萬世法渡江而後晉者世吏二千石遂為江南著姓今占籍於廬陵之吉水焉曾祖諱讓祖諱休仕南唐為侍御史烈考諱澄贈大理寺評事妣高氏贈南昌縣太君繇公之請也僖皇東遷朱梁篡奪版蕩幅裂稱尊號者非一姓李氏阻江為國自紹唐統御史府君忠於所奉遂為天子之外臣于時廬陵大郡毛為右族官於霸朝卒以法進丞寺署坐

郡曹者咸綽綽有名國人韙之御史府君藏書數千卷
闢田數百頃嘗語人曰欲仕者可以識廢興欲隱者可
以實倉廩吾於子孫計足矣乃玉笥之陽有終焉之志
公幼喪所天刻意自立砥名勵行文為聞人真宗皇帝
得祥符之始年舉進士御前解褐授杭州臨安尉負海
名邦古稱都會探丸仇吏人或輕揚公廣為方略多設
耳目尉羅所得囊橐皆空人被其仁至今稱誦選部
調補江陵府司理叅軍以情察獄寬而能斷所經訊讞

民自不寬秩滿遷萬州軍事推官坐堂缺守權董郡事束縛姦吏按摩疲人威凌秋霜惠溫冬日薦紳立朝之士狀其績用聞於廷者十一人歸朝擢授大理寺丞知筠州高安縣平心御物曲直立分箕歛盡除囂訟自止暮年移知寶州軍州事轉太子中舍郡在合浦之東千里而近地多珠貝犀象沉檀之產前之剖符者往往舳舻銜尾竭其土物公北歸之日盡室一舟無銖鎰南國之貨入朝授殿中丞國子博士歷通判虔筠太平等軍

州事公性寬厚守撫損當官不示圭角以沾赫赫之譽
所去民皆思之信愛朋友未嘗斥人之非故朝士多其
長者監郡之職與刺史權均而勢逼固祿位者率以將
迎守意臨事不自可否屏氣低首趨府如幕吏吏持案
牘立前山疊波委擲管署紙尾不敢議其是非及捐者
為之則剛而犯上相持短長缺士大夫之行者多矣公
處以中和不茹不吐三贊郡事人亡間言自筠之移姑
孰也抗遺榮之志將歸舊隱乃白奏奉身而請老焉朝

命以本官致仕一子授太廟齋郎以美其冥冥之節詔
未下不幸屬疾以明道二年三月丁丑考終命於當塗
之官署享年六十有七夫人高氏封某縣君夙奉姆教
恪脩婦式婉容淑範為閨房之秀府君列朝著理郡務
遺清白於子孫者夫人實有內助焉公即世既踰月惟
堂哭晝未亡之歎方深同穴感義溘至之期共盡以某
月日終於池陽舟次越明年某月日合而祔之於某原
禮也三子長曰漸太室齋郎次曰溥以毀卒次曰洵擢

進士第調判入四等授越東節度推官知宣城縣事三
女長適進士陳敏中次適進士習遵路次適進士艾瑀
六孫伯奮伯達伯玉餘尚幼將葬洵以狀來乞銘而掩
諸幽乃銘曰

周之懿親 魏之名臣 越有裔孫 生茲德門
行為士則 才為世賢 所治七官 遺愛存焉
身羈紱綬 志在林泉 公既知止 時方引年
乞身西歸 朝恩霈然 未被出綈 俄驚逝川

哀殞庭蘭 悲摧無鷺 靈輪筆宅 相隨九原

令嗣執喪 戚容藥藥 泣狀遺績 乞銘塋埏

嗚呼榮陽 府君之阡

榮陽毛君墓誌銘

君諱溥字之祖於周為姬姓文王之子國於毛子孫以
國為氏春秋之際世為王卿士在漢時長及享皆為魯
詩各以其家名學儒者至今宗之晉永嘉之亂士族南
徙寶有戰功為廬江守名著竹帛而毛宗益興在南夏

矣宗齊而降代有瓌傑家牒闕墜不復殫紀今為吉州
吉水人大王父諱某侍御史王父諱某贈大理評事考
諱某國子博士終於姑孰同守以文學起家所理七官
皆著治效閨門肅肅若居官庭妣曰高氏封壽春縣君
奉舅姑以禮訓諸子以嚴里閭稱之姑孰府君三子伯
曰漸季曰洵君即中子漸太室齋郎洵鎮東府從事君
幼聰悟博覽羣籍及子史百家之言與人交不苟合孝
謹友愛發於天性自從事君未仕時君已能為進士業

矣。吉於江西治最劇，其士人倍他郡。而歲貢俊選，偏以限人之制，褒博臂湊，歌鹿鳴而送之，十不取一衣冠家。有令子弟鴈行而進，求鄉先生之薦者，郡中正往往畏鉗忌之口，不克偕舉。從事君既冠，則與君並在賓興籍。中君曰：「吾才不如季，脫不幸而順吾長，以我先舉，則為奪吾季之名也。」讓不乞試，退而脩家人產業。季果得薦取太常第。邦人義之，從事君既上第，君始有仕進之意。行益淳學益勤，聲名流四方，而祿未及之。以明道二年

五月十六日卒享年三十有八初姑孰府君屬疾君嘗藥而後進不去冠帶者三月晝夜不寐兩目盡瘡府君棄世未踰月母夫人壽春君亦亡君哀號慟絕勺飲不入口並侍兩喪全柩歸葬途次鍾陵柴數越制終於舟中其弟洵扶護其父母兄及已之妻之喪以歸哀感行路以某月日葬於某府君之塋次禮也君娶劉氏柔嘉之德冠於族姻子男三人長曰伯奮始志於學餘尚幼女二人皆未笄於戲君之行可以激薄俗室奔競宜壽

而貴者乃以荼毒滅性不享永年可哀也哉故為之銘
銘曰

生於德門 言淳行實 讓弟以仕 哭父而沒
義而孝兮 胡不終吉 吁嗟毛君 居此窀穸

宋故鎮東軍節度推官毛君墓誌銘

景祐元年十一月戊辰故鎮東軍從事毛君卒於家明年九月壬午葬於廬陵吉水之仁壽鄉南華原先府君之塋次君之兄遣使持書走京師謂其友余某曰漸之

弟才未盡施抱恨入土恐其名之易漫滅也請銘而久之某於君遊最厚熟其行故得書而無讓焉君諱洵字子仁世居吉水業儒為冠族曾祖諱休侍御史祖諱澄贈大理評事考諱應仝國子博士母曰壽春縣君高氏君器度方正動自脩尚幼精敏能屬辭及冠舉進士試祕書省校書郎性篤於孝視榮利泊如也凡守四官再以親解初補撫州司法叅軍先府君適知寶州寶在南海南千里遣人問起居者死於道信不得通君喟然嘆

曰惡能以擔石祿割親之愛經時聞然不知息耗而自
安廼因郡郵言狀不待報棄官去暨府君歸朝君再調
洪之新建簿以書判拔萃天子御便殿試之所對入等
改試大理評事遷鎮東軍節度推官知宣州宣城縣
事政有繩墨民咸宜之未踰歲江淮制置使器其能奏
監揚州推鹽倉詔既下留侍親疾不就職執藥調膳嘗
而後進積三月不之寢室亡何府君暨母夫人相繼卒
君與兄漸奉喪歸葬持畚荷土手胝面黔親友不能識

塋外松柏皆所自樹遂結廬墓所而居之居憂凡二十
一月朝夕哭踊如初喪之儀所食才脫粟不加薑桂同
閨諸生數十人日湊廬旁執弟子之禮請君敷辯經義
君對之流涕未嘗言文廬中非號泣時則寫佛書讀喪
禮而已自廬次得疾歸家數日卒享年三十二郡以孝
行聞詔賜其家粟帛百以旌顯之君二昆伯曰漸太廟
齋郎仲曰溥先以歿卒夫人生一男一女皆夫夫人前
君卒別葬不祔其銘曰

文行俱 家世儒 力孝弟 恬進趨 再棄官
為親謀 失怙恃 返邱墟 飯脫粟 居倚廬
不終喪 殞厥軀 位未充 材有餘 祔無婦
哭無孤 善罔報 天何如

宋故峽州軍事推官贈太常博士魏公墓誌銘

并序

公諱清字友置洪州南昌縣灌城鄉龍沙里人畢萬始
賞世為晉卿韓趙協力終踐侯爵因國命氏子孫繁馬

相曹公族蟬聯於漢晉矣曾祖玘祖奭考儼並以唐祚
哀季帥臣專兵割裂土壤喋血為縱橫之業進則私署
耻為陪臣繇是潛德邱園不食其粟家世以財雄州黨
公昆仲四人求分父產人人自占其膏腴公悲以服玩
田宅讓之脫身而去獨取犀帶一條市書力學退居西
山名溢人口李氏竊據江左自稱後唐封拜予奪之柄
自專之我宋開國始授正朔公聞其順命乃萌蒞仕之
意開寶三年猶以禮部侍郎張洎私掌貢籍公以進士

中其選李主批云魏某勵志謹行學有餘文與二三子不同可特放及第釋褐授饒州餘干尉艤牂東下青蓋入洛公授王命為滑州靈河尉將漕臣樊知古上殿奏公富文達學吏材幹敏中旨召赴闕將加顯秩引對之日逆氣併喘口噤不能語詔授散官以就土地之醫除陳州叅軍二年疾愈州將奏公云煩而使之屢觀錯節文長牋奏政蕙威惠願加擢用以勵能者頃之中旨復令詣闕學士院召試授許州臨潁主簿公以江南擢第

非王室之命故授官不復以科名為叙仍自臨賴再應
進士舉京輔近藩尤重舉首公就試羣士亡出其右明
年殿廷覆試中甲科時端拱二年也御試前一日公肺
忤冑喘坐卧艱苦呻吟危篤之際沈然而寐夢一道士
謂公曰姓名定矣勿復憂之中夕痊平詰早赴赤墀之
試無恙馬初禮部籍奏公名在九十一暨臨軒唱第
名次如舊事與夢叶聞者異之授保信軍節度推官兩
川地險人心如之宿籌幙畫咸擇聲稱移閬州觀察推

官居亡何黃巾竊發軍城失守民潰其上力所不支郡
無良將遁以避難降資授峽州軍事推官秩滿歸闕咸
平四年季夏五月十三日以疾終於輦下享年六十三
歲散官至給事郎兼官至大理評事累贈至太常博士
公簡而不倨廉隅自守在官三十年俸給之外秋毫無
橫入性寬厚未嘗失色於人即世之日家無餘財識者
稱之夫人樂氏以屯田君貴封河南縣太君生五子長
曰英次曰蒙並遺名好遯混迹閭里次曰莊咸平三年

進士及第即屯田君也次曰舊次曰芳皆早世二女長
適進士劉覺次適進士尹中正屯田君羈貫之歲公即
器之嘗謂親舊曰待第三子成名吾死無憾矣果以屯
田君登第之明年而卒知子莫若父豈虛語哉明道二
年屯田君罷守晉康郡乃曰有父不葬終身之戚遂露
章乞告便道歸營窆窆之事朝旨從之以其年十月抵
豫章兆有日矣河南君尋以壽終乃祔焉府君自咸平
辛丑歲卒明道癸酉歲始克襄事而河南君發柩同歸

蒿里死生之會期有數歟以是年十二月十九日皆窆
於新建縣善政鄉羅垆里乃為銘曰

奕世潛德 運遘衰微 丁年筮仕 識照安危

項滅歸漢 吳亡得機 才高命蹇 畢世早飛

烏經卜宅 驚鑑同歸 死生離合 各有其期

西山巍巍 銘鈴依依 此焉壤樹 行路興悲

附錄

宋故朝散大夫守工部尚書充集賢院學士前

知廣州軍州事兼管內勸農市舶使提點銀銅
場公事充廣南東路兵馬都鈐轄兼本路經略
安撫使柱國始興郡開國公食邑二千六百戶
食實封二百戶賜紫金魚袋贈刑部尚書余襄

公神道碑銘

并序

推誠保德崇仁翊戴功臣觀文殿學士特進
刑部尚書知亳州軍州事兼管內隄堰橋道
勸農使及管勾開治溝洫河道事上柱國樂

安郡開國公食邑四千三百戶食實封一千

五百戶歐陽脩撰

始興襄公既葬於曲江之明年其子仲荀走于亳以來
告曰余氏世為閩人五代之際逃亂於韶自曾高以來
晦迹嘉遁至於博士府君始有祿仕而襄公繼之以大
曲江僻在嶺表自始興張文獻公有聲於唐為賢相至
公復出為宋名臣蓋余氏徙韶歷四世始有顯仕而曲
江寂寥三百年然後再有聞人惟公位登天臺正秩三

品遂有爵土開國鄉州以繼美前哲而為韶人榮至於
褒卹贈謚始終之寵盛大蓋褒有詔卹有物贈有告而
行謚考功有議有狀合而誌之以閱諸幽有銘可謂備
矣惟是螭首龜趺揭於墓隧以表見於後世而昭示其
子孫者宜有辭而闕焉敢以為請謹按余氏韶州曲江
人曾祖諱從祖諱榮皆不仕父諱慶太常博士累贈太
常少卿公諱靖字安道官至朝散大夫守工部尚書充
集賢院學士知廣州軍州事兼廣南東路兵馬都鈐

轄經畧安撫使柱國始興郡開國公食邑二千六百戶
食實封二百戶治平元年自廣朝京師六月癸亥以疾
薨於金陵天子惻然輟視朝一日賻以粟帛贈刑部尚
書謚曰襄明年七月乙酉返葬於曲江之龍歸鄉成家
山之原公為人質重剛勁而言語恂恂不見喜怒自少
博學彊記至於歷代史記雜家小說陰陽律歷外暨浮
屠老子之書無所不通天聖二年舉進士為贛縣尉書
判拔萃改將作監丞知新建縣再遷祕書丞刊校三史

充集賢校理天章閣待制范公仲淹以言事觸宰相得罪諫官御史不敢言公疏論之坐貶監筠州酒稅稍徙泰州已而天子感悟亟復用范公而因之以被斥者皆召還惟公以便親乞知英州遷太常博士丁母憂服除遂還為集賢校理同判太常禮院景祐慶歷之間天下怠於久安吏習因循多失職及趙元昊以夏叛師出久無功縣官財屈而民重困天子赫然思振頽弊以脩百度既已更用二三大臣又贈置諫官四員使言天下事

公其一人也即改右正言供職公感激奮勵遇事輒言無所回避姦諛權倖屏息畏之其補益多矣然亦不勝其怨嫉也慶歷四年元昊納誓請和將加封冊而契丹以兵臨境上遣使言為中國討賊且告師期請止毋與和朝廷患之欲聽重絕夏人而兵不得息不聽生事比邊議未決公獨以謂中國厭兵久矣此契丹之所幸一日使吾息兵養勇非其利也故用此以撓我爾是不可聽朝廷雖是公言然猶留夏冊不遣而假公諫議大夫

以報公從十餘騎馳出居庸關見虜於九十九泉從容
坐帳中辯折往復數十卒屈其議取其要領而還朝廷
遂發夏冊臣元昊西師既解嚴而北邊亦無事是歲以
本官知制誥史館脩撰而契丹卒自攻元昊明年使來
告捷又以公往報坐習虜語出知吉州怨家因之中以
事左遷將作少監分司南京公怡然還鄉里杜門謝賓
客絕人事凡六年天子每思之欲用者數矣大臣有不
喜者第遷光祿少卿于家又以為雅州刺史壽州兵馬

鈴轄辭不拜皇祐二年祀明堂覃恩遣衛尉卿明年知
虔州丁父憂去官而蠻賊儂智高陷邕州連破嶺南州
縣圍廣州乃即廬中起公為祕書監知潭州即日疾馳
在道改知桂州廣南西路經略安撫使公奏曰賊在東
而徙臣西非臣志也天子喜之即詔公經制廣南東西
賊盜乃趨廣州而智高復西走邕州自智高初起交趾
請出兵助討賊詔不許公以謂智高交趾叛者宜聽出
兵毋沮其善意累疏論之不報至是公曰邕州與交趾

接境今不納必忿而反助智高乃以便宜趨交趾會兵
又募儂黃諸姓酋豪皆縻以職與之誓約使聽節制或
疑其不可用公曰使不與智高合足矣及智高入邕州
遂無外援既而宣撫使狄青會公兵敗賊於歸仁智高
走入峒邕州平公請復終喪不許諸將班師以智高尚
在請留公廣西委以後事遷給事中諫官御史列疏言
公功多而賞薄再遷尚書工部侍郎公留廣西逾年撫
緝完復嶺海肅然又遣人入特磨襲取智高母及其弟

一人俘於京師斬之拜集賢院學士久而徙知潭州又徙青州再遷吏部侍郎嘉祐五年交趾寇邕州殺五巡檢天子以謂恩信著於嶺外而為交趾所畏者公也驛召以為廣西體量安撫使悉發荆湖兵以從公至則移檄交趾召其臣費嘉祐詰責之嘉祐惶恐對曰種落犯邊罪當死願歸取首惡以獻即械五人送欽州斬於界上公還邕人遮道留之不得明年以尚書左丞知廣州英宗即位拜工部尚書代還道病卒享年六十有五

公經制五管前後十年凡治六州所至有惠愛雖在兵
間手不釋卷有文集二十卷奏議五卷三史刊誤四十
卷娶林氏封魯郡夫人子男三人伯莊殿中丞早卒仲
荀今為屯田員外郎叔英大理評事女六人長適職方
員外郎郭師逾次適屯田員外郎孫邵次適宿州觀察
支使周熊次適祕書省校書郎章惇裕次適越州上虞
縣主簿張元淳一尚幼孫男七人嗣恭嗣昌皆大理評
事嗣隆太常寺奉禮郎嗣徽嗣光嗣立嗣京未仕孫女

五人銘曰

余遷曲江	仍世不顯	奮自襄公	有聲甚遠
始興開國	襲美於前	兩賢相望	三百年間
偉歟襄公	惟邦之直	始登於朝	官有言責
左右獻納	姦諛屏息	慶歷之治	實多補益
逢時有事	奔走南北	功書史官	名在夷狄
出入艱勤	陰夷一德	小人之讒	公廢于里
一方有警	公起于家	威行信結	嶺海幽遐


公之在焉 帝不南顧 胡召其還 殞於中路
返樞來歸 韶人負土 代石刻辭 立於墓門
以貽來世 匪止韶人

書余襄公集後

景祐歲范文正公貶不以罪大臣肆忿臺諫緘默余公
歐陽公交章辯論義氣所激非為利也既連坐竄逐後
復中以奇禍果有利心肯為是耶是舉也有東漢李
杜之風賴時清明不成黨錮之禍文忠公著朋黨論

意有規於後也卒不能揀紹聖崇寧之橫流至使故家遺俗流風善政掃蕩無餘而胡虜之變作矣事之微漸甚可畏也主上中興更張改紀歲無虛日收燼起廢士氣振復然窺閒投隙挾舊圖新者尚可懼也嗚呼以公視昔何但前車之戒耶公文聲與歐陽公同時豈晚進敢議如辨堯舜之謚號攷秦漢之興亡以儒為正以釋為權皆後學所當知者寓意賦詠欲嶺上置闕籍簡官吏行李之往來以辨清濁凡宜施於今日屬除目賜告

獲閱一過訂正謬誤數十字因書於後紹興丁巳隸
川韓璜題



武溪集卷二十